

戚少保年譜耆編

戚少保年譜耆編卷之五

閩嗣祚國彙纂

緄嗣昌國集錄

廩嗣報國詳訂

庠嗣興國叅校

嘉靖四十三年甲子家嚴三十七歲

春正月駐軍俞潭領勅任總戎事委裨將剿山賊親
追遁倭於坂尾屯師芴溪山

朔日乙亥差官王輔親齎總兵勅到營卽於興化
府俞潭軍中到任領事時倭南遁遂行各郡縣脩

城堡堅壁清野嚴加守禦仍行署小埕把總傅應
嘉督本寨水兵防倭劫漁舟下海而倭過南安晉
江葛州等城無不垂涎時水陸備禦周密故城堡
得保無虞初八日壬午倭遁至安海堡攻城時已
發兵間道浮海入堡協守爲禦初十日甲申解圍
南去守堡指揮白希周千戶方璽武生楊大岳等
縋城尾截斬首四級十四日戊子倭屯沈井分支
黨攻窯山堡適直指李公出巡興泉隨營紀功軍
門委監軍汪公協贊機宜興泉道李公監督泉州
太守周公道光備賞撫軍同知譚公維鼎督糧餉

僭夫馬通判關公於政晉江尹譚公啟供應軍儲
擬十九日癸巳家嚴督大兵搗沈井倭巢倭聞信
拔營由同安城外遁烏泥二十三日丁酉夜半潛
襲高浦所豎梯登城守軍禦卻之黎明千戶李如
玉出戰斬首三級二十四日戊戌倭分支黨三千
人遁長泰溫山餘寇會於集善里之坂尾是時仙
圍解依期放班見兵六千餘病疫外堪戰士不滿
五千南路官兵除分布城隘把截外隨營協剿止
有千人賊多兵寡勢不相敵土著之民觀望不前
泉漳奸細更多家嚴乃出懸賞有獲接濟真犯一

名賞白鏹三十兩又令同知譚公嚴行社首林時
憲密領鄉兵分伏要路緝獲犯人柯六等十四名
腰刀二把火藥三十斤卽梟首傳示人心始肅而
接濟之竇隨絕蓋坂尾三面阻水止有一徑崎嶇
勢難進剿乃駐師安民苧溪諸山之上因逼近賊
營乃以前獲賊偵洪子政縱之使行間以謀賊僞
焉

二月一捷於王倉坪再捷於蔡坡嶺舊倭盡滅

是月甲辰朔十政報賊約於初三日起營次日家
嚴親歷近巢深青度形勢布分哨以北路守備王

加龍將左軍把總陳濠將中軍南路署守備耿宗
元將右軍義總吳京典史傅稅吏員金文通爲督
陣子夜銜枚肅進設伏深青次日黎明倭不出正
路乃緣南山而下去我兵二十里家嚴卽分兵四
路由仙店追至同安田裏杜之王倉坪倭方午炊
窺我兵數寡出五千衆列陣以待我兵氣奪家嚴
折箭爲誓以軍令促諸裨將如龍當陣擲刀激奮
官目因欲引刀自裁以死綏鼓三軍之氣於是義
總丁茂朱九龍奪招幢而先突大衆踵武擁擊之
血戰數合前黠應鋒而殪後倭借前倭翼蔽先奔

絕嶺而去別山枝黨二千餘從脇掩襲中軍張元
勲陳祿由大麓近擊右軍耿宗元率千戶暴以平
胡仲膏滕易陳倉等亦由北山抄突賊腋倭不支
乃奔大山我兵追上山巔勇益奮戰至日暮倭始
披靡負極墮死山巖者甚眾餘亡命遠遁朝天嶺
外計斬首一百七十七級救俘男女三千人獲甲
仗五百九十四件時倭之被傷者多而各鄉兵在
在俱有斬獲敗倭尚有七千餘扶傷宵遁知追兵
勢急特選精黠四千徒殿後往合長泰支黨及長
泰野無所掠晚至溪北食糖員多中毒死者毒乃

副使周公令人所置也十二日乙卯倭遁至漳浦縣屯北關外柳場浦有奸民十五人投賊獻城言此城不可明攻見今南門外木柵未完可從此暗襲之須過城二十里以緩城守約十六日夜潛回城下內應以白巾白衣白旗爲號乘夜礮堞夫弔倭登城倭於是過縣至無象舖據蔡坡嶺爲巢竊窺縣治復分枝黨由雲霄去以掩耳目本日中丞譚公親詣營會議直指李公隨近紀功監軍汪公分撥部兵協戰海防周公隨營監督泉州同知譚公漳州同知鄧公士元隨營贊畫漳州同知劉公

月入在言一
宗寅督餉通判劉公謨措處夫馬兵食十五日戊
午大兵抵漳浦偵得賊前情卽夜分布機宜以坐
營把總陳濠將中軍正兵統領義總陳祿陳文登
百戶張元勲等部吳京佐之以守備王如龍將左
奇統義總楊世潮丁茂朱九龍等部金文通佐之
以遊擊李超同署守備耿宗元將右奇統義總胡世
蔣伯清暴以平胡仲膏方伯樓大有等部王輔佐
之而合後則以陳達樓子和施觀定俞一和暨陳
倉滕易楊世潮等部爲老營屯山上以備策應十
六日巳未卯時先發老營兵登巢後高山俯視倭

巢山麓如釜底四壁若削立萬峰森聳叢林翳茂
田洋盡甘蔗長林雜以棘刺賊先瞭見我兵預已
設伏林內法所謂兩鼠鬪於穴中非用武之地也
旣而按圖分布舉礮齊麾左路當先過蔗林而伏
倭四起我兵進戰合禦勢不得前家嚴手刃退縮
旗手一人各兵悚懼元勲躍馬當先部兵奮勇冲
賊巢倭乃大敗別有枝黨徑冲山上襲裏老營陳
遠等自山巔投林而下前鋒哨官李嘉珍當先戰
沒於是眾輒倍作又大敗之各兵據山四面合圍
倭尚聚數千堅陣冲突兵皆盛氣以待然賊以一

面當冲據壘自固而我兵向後襲之倭後轉戰我兵因轉四襲倭勢大阻各投林莽避匿我兵悉持短刀穿叢人自爲戰賊愈窘急轉入深林乃縱火焚林積尸在巖險灰燼者不下千餘計擒斬共一百六十有奇後秋時伐蔗始見白骨成堆奪獲器仗三百八十五件其奸細名總管五千大頭目者亦就戮此捷所殺俱係慣戰黠倭視死綬猶有生氣比時冒險而殲勦敵伐謀而保危城冲鋒決勝則張元勲之功居多深入寇壘偵邏賊情大兵入深山如走熟路則義總俞世龍錢助禮哨官王漢

沈元等功亦不少也陣亡者哨官李嘉珍等三十
一人餘孽亡命追至湯坑等處復擒三十七級殘
倭負傷晝伏夜行突詔安西沈由雙港趨而入廣
十九日壬戌酉時前枝黨由雲霄去者突至詔安
大陂夜由九上落山亦奔廣東我兵追及兩界各
賊盡氣狂奔已突潮州而南倭初令從賊者探得
潮州花腰峰等處山倭二寇跳梁故欲出廣東合
黨會山賊已撫只有殘倭四百該鎮俞總兵提師
一萬困逼已久又聞兩廣制府調狼兵二萬來潮
截剿各倭跋前疐後草木皆兵連夜入廣東沿海

覓舟歸國白晝輒相愕曰戚虎來矣今而後始知
犯華之不利也

附錄饒歌十詩

石馬岡塞草黃鳥夷如蟻戈如霜孤城岌岌禍叵
量將軍赫然怒灑淚誓戎行伊余有事在邊疆愿
與百雉俱存亡朔風動地吹沙場卷甲宵馳石馬
岡

戰城南搗連營蠢爾倭奴方打城將軍從天下軍
聲如雷轟招搖焯燿搖靡震驚三面崩潰萬姓歡
迎誰不曰吁嗟乎戚父生我

安海危命如縣窮寇併力幾不支
潛師入援誰則知神竒殲黠虜
摧威虎何爲復在茲並日未得食
飢吟將安施

嗟彼高浦叢爾土虺賊突來今爲虜
朝飛羽書夕聞鉦鼓將軍之師真時
雨雨霈氛消烝人胥宇
苧溪之涯維石欽崎營壁壘樹旌旗
賊避三舍莫敢窺賊不得食我且炊
獍驚遠遁熊虎馳天聲震動苧溪之
涯

苑苑深青毒霧冥冥我師宵發賊胡
敢以匱霧樹開伏甲起前驅狼跽悉
奔徙還係累芟豺兕歸來

戚少保年譜

卷五

何曾遺一矢

漳浦湯湯列陣堂堂賊失勢我軍張上將鷹揚鋒
蝟而斧螭右翦左屠羣兇殄僵露布星馳奏未央
炎炎勲伐震遐荒

仲春振旅英風翔童兒竹馬迎道旁一月三捷往
績輝煌今茲黠虜驚立鵠張我憂忘寐竟夕迴腸
經時野次爲公霑裳鯨鯢盡海邦康願圖形容以
禴以嘗

將進酒公樂否虜狎我疆使我心恟藉公之威旣
馘旣踣黠民蘇餘孽走父老遮鷹行壺漿獻馬首

謳歌載道公樂否

閩海澄清風塵不驚風塵不驚誰與爾爭名我稷
我社維我干城猶曰我何功哉惟帝之明願言畢
力以庶幾太平

擬樂府

戰河陽逆賊僵古稱唐將奮鷹揚今聞戚虎心膽
栗掃蕩妖氛特瞬息萬民盡喜躋壽域試問康衢
誰之力方今名將功第一何羨當時李光弼戚
公來戰勝先聲播眾宇戚公至慰却來蘇如時雨
君不見郭令公單見虜回紇羅拜無敢侮

福建提督巡撫都御史譚公題上捷疏云蠢爾倭
奴節被勾引侵擾閩地攻陷郡城狂醜雖經蕩平
內逆尚多漏網乃復沿習故智結連萬倭大舉入
寇幸而水陸多備俘馘相仍及其擁眾攻城意在
必下客兵久戍數僅相當乃能一破之仙遊再破
之同安王倉坪三破之漳浦蔡坡嶺先後斬獲實
級多至二千有奇焚溺毒死稱是卽鼠竄狼奔僥
倖免死者尚數千人而傷弓驚餌自是遠逝高飛
矣且令睚眦之民目擊堂堂之陣奸宄爲之改慮
善良以之安心拔本塞源端在於此此皆鎮守福

浙總兵都督同知戚某居宦成而志氣愈勵乘戰
勝而智慮益精冲瘴癘之鄉冒風雪之會勞苦不
暇身謀解仙遊之困伐漳浦之謀全活何可數計
西賊愁聞不啻仲淹之風烈南人不反庶幾諸葛
之天威比年雖已三見蕩平而此舉實爲萬代瞻
仰功當首論巡按御史李公邦珍亦上捷書曰臣
惟福建上年小汎登犯倭寇屯攻仙遊縣凡五旬
十二月二十六日被總兵戚某督兵殺敗解圍尚
有萬餘南下今年二月初二日總兵戚某追至漳
州同安王倉坪地方大戰斬級千餘餘賊星奔漳

浦縣無象舖蔡坡嶺地方本月十六日又被總兵
戚某追及斬獲數百餘級賊破膽捧頭竄遯廣東
潮州地方離閩境千里卽今山烽雖未盡熄海波
實爲不揚矣家嚴自漳浦凱旋中丞直指兩公行
監軍與家嚴分布官兵專備春汛乃督行都司羅
公章大守胡公處分糧餉鹽運同知劉公汝順推
官鍾公脩理舳艫中軍義總崔經福清二尹陳永
整飭器械把總魏宗瀚分信烽火門屬舟四十艘
把總傅應嘉分信小埕寨屬舟三十六艘把總羅
繼祖分信南日寨把總秦經國分信浯嶼寨各屬

以三十二艘尚有舟三十一艘屬把總鄧銓分信
銅山而羅繼祖鄧銓俱新任仍益以原署南日烽
火千戶顧喬指揮朱璣分佐之各據上游防之北
路守備王如龍將義總楊世朝等部三千人屯壁
福置聽分守塗公澤民監督署南路守備原任都
司耿宗元千戶暴以平同義總屠本道等部三千
四百人屯壁漳州聽分巡周公賢宜監督而以分
巡何公全監坐營把總金科軍屯壁泉州將義總
金宗岳等部千二百人軍門標下把總陳其可壁
連江將義總全福等部千六百人坐營把總陳濠

壁福清將義總朱珏等部二千四百人家嚴親督
義總陳祿等部二千四百人專備截戰監軍汪公
統義總崔經等部千六百人鎮壓省城遊擊李超
統義總楊文等部專剿山賊各據要害防之於陸
是時李超等剿赤水山賊未回平和山賊藍松山
復叛二十二日家嚴命南路署守備耿宗元統義
總暴以平俞一和胡仲膏等兵協剿松山者廣東
程鄉山賊也久已聽撫於本月十五日復叛陸梁
於平和之東淘尋流劫漳浦聞大兵將至仍退平
和屯據大烽爲巢

閏二月請鎮守關防符驗旗牌

是月南贛軍門吳公百朋福建軍門譚公綸通行
各道會剿山賊家嚴以倭難孔棘不獲親執鞭弭
乃發部將遊擊李超統守備樂垣義總施觀定張
九韶蔣伯清何十之等兵四千六百名赴永安等
處隨賊向往相機堵截先是三十八九年漳州龍
巖縣有山賊蘇阿普陳光明等聚黨爲盜光明被
賊羣盜亦創延平太守周公賢宣已撫阿普爲良
民而附近有司喜功生事食信擅捕至癸亥十二
月阿普又與曾東田馬湘源等嘯聚二千人據巢

赤水剽掠大田等處又有楊一等屯據赤水北山
依蘇賊行劫延建之間故兩軍門檄行會剿是年
閏二月二十七日遊擊李超等在永安城外禦却
山賊追至吉山斬首二十九級賊負極浮渡溺死
甚多餘仍遁歸香寮老巢

三月命部將蕩平香寮等巢

是月初五日丁未前山賊楊一自洪田敗於贛兵
遁歸大坑匿族人士樓內爲本族楊偕等縛獻羣
醜散遁分巢蘇家等寨初九日辛亥李超攻香寮
大巢勢急賊懼獻魁首二級詐降超不允督伯清

等攻益力乘勢縱火燬賊無算生擒妖賊梁廷初
從賊九名斬首一百二十級次日壬子破蘇家山
寨焚賊百四十餘斬首三十一級而本日又破蓋
竹溪寨斬首五十級次日癸丑申時又破祠堂後
曹家寨斬首三十三級我兵陣亡邵士厚等三十
三人十五日丁巳趙督金福景良忠等兵銜枚疾
趨申刻抵蘇家寨鑿崩巢牆三丈一擁入城縱火
焚燬止斬首百五十八級巢穴盡掃惟渠首蘇阿
普范繼祖馬湘源曾東田等遁去與藍松山合黨
潛移大田縣團柯結巢二十四日丙寅倭舟三艘

約二百人先在長樂境詢知舊倭剿絕痛哭開舟
卻道遇南日舟師犁沉一艘溺倭五十餘其二舟
奔老岸開至福清一登後邱一登東張本信把總
金科督義總朱珏趙記戚子明等追至東張倭分
二村午炊我兵先圍一巢燔礮燥鉛賊不能支斬
首五十五級焚燬亦五十有奇又移兵彼巢未及
而倭已散投山林止追馘十三級捕擄一人奪獲
夷器六十六件二十五日丁卯倭舟七艘自浙海
浮至青山澳本信把總魏宗瀚禦卻之又雙桅大
舟一艘泛至永甯衛坑尾澳遇水兵望風南遁又

倭舟一艘駕浮鐘門本信把總羅繼祖督哨官楊子信犁沉斬首二十級餘賊俱溺奪獲器仗三十九件又倭舟七艘突至大桿洋本信協總朱璣督哨官劉文敬等犁沉二舟風狂不能收功止生擒二名餘舟遁去又沙舟一艘約賊百餘徒自北洋南泛本汛把總魏宗瀚督舟師追至芙蓉洋不及而遁又巨艦一艘流浮詔安本縣鄉兵禦卻南遁二十七日己巳舢舨倭舟一艘突泛東礮又一艘流浮北礮該信把總傅應嘉督哨官馬雲鵬等舟師禦之遂卻遁二十八日庚午又一艘浮鳥邱逐

漁舟次日俱南遁二十九日辛未大小弓鞋二艘突漳浦南風澳約二百徒流劫莆頭南山村爲鄉兵禦卻之亦開舟南遁

夏四月分防水陸各部捷

孟夏朔日壬申雙桅白舫船一艘小舫一艘流突東北海洋不敢窺岸徑南遁而去初三日甲戌倭舟一艘入料羅澳登岸鄉兵禦卻復奔舟南遁初四日乙亥耿宗元督義總暴以平屠本道吳良棟等追藍松山等山賊一戰於團柯斬首三十級再追德化之小孟斬首一百九十四級三追於仙遊

之社巖斬首一百四十五級三捷共計三百九十七級蘇藍二賊奔入土城乃合兵連柵圍擊敗之初五日丙子倭舟一艘不敢窺岸由虎頭山外洋南遁初九日庚辰前後郎東張殘倭遁至莆田牛頭嶺中路守備胡守仁率方伯張元勲等部堵截之斬首十五級又令方伯追至石坑斬首二十九級前賊盡殲又大峰頭艚船一艘自南洋突至北茭澳擄小垵出哨八槳船一艘民船一艘該汛把總傅應嘉督舟兵追回原舟倭皆遁去十三日甲申弓鞋船一艘流浮詔安南向遁去十四日乙酉

戚少保年譜

卷五

舢舨船一艘繡鞋船十艘駕入福甯海洋烽火把
總魏宗瀚約小埕把總傅應嘉各督舟師出洋夾
剿賊懼舢舨船遁東北洋繡鞋船遁東南洋獲空
舟一艘而還十五日丙戌雙桅巨艦一艘流突陸
鰲橫嶼十七日戊子繡鞋船二艘駕浮北洋十八
日己丑倭舟二艘浮葦衣山又三艘浮至東沙二
十一日壬辰巨艦一艘弓鞋三艘駕至南風澳各
倭舟合艚登岸攻鹿下土圍各水寨把總魏宗瀚
傅應嘉鄧銓等俱踵倭登岸會同詔安主簿金璣
鄉兵夾攻斬首四級餘倭敗北下船乘夜開遁二

十四日乙未倭舟一艘突至金沙澳見舟師而遁
又五艘由內港突至礁頭登岸該本汛把總鄧銓
追遁又四艘約倭四百徒拋泊福清海壇山之東
牆二十五日丙申倭舟一艘入深滬澳搶漁舟突
烏墘圳上澳該福全所千戶張充椿追遁二十六
日丁酉雙桅巨艦四艘泛東北外洋南遁夜半前
圳上澳遁倭復入烏墘澳與泉把總金科督兵進
剿賊懼而遁其日本汛哨目林廷中督兵舟追至
三鼓抵東北外洋犁沉一艘止生擒一俘時協總
指揮朱璣病假同省坐駕柯澄船於是日未分至

湄洲外洋遇倭舟二艘璣扶病麾兵奮戰犁沉一艘約賊五十餘徒尚有一艘抗敵至酉分傷過半入夜不能收功止斬首三級生擒三夷三十日辛丑前礁頭敗倭復由內港突至陳平渡拋泊入夜開遁把總鄧銓率哨官劉文敬等舟截擊之追至三鼓焚燬一舟沉溺甚眾斬首六級生擒二夷救俘係男婦十八人奪獲夷器八十八件餘倭七十餘負極焚舟登岸奔莆頭澳爲鄉兵所遏搶弊舟補塞而遁

是月兵部勘覆仙遊等功云前項倭奴始而虐焰

方張踵興化之故智久困仙遊繼而奸謀未遂知
漳泉之殷富突出長泰羣醜縱橫八閩騷動仰仗
聖主在上天威遠震我兵奮勵三戰三捷斬獲之
級多至二千有奇焚溺毒死者不計其數是誠十
年未有之功所據總兵戚某巡撫都御史譚綸文
武相資謀勇交濟在戚某則臨敵制勝不遺餘力
時出奇正之方在譚綸則應變隨機不遺餘智親
履艱危之險臣等待罪本兵目擊盛事深爲朝廷
得人稱慶疏上奉旨各賞白金三十兩紵絲衣二
襲仍與汪道昆王如龍等勘報至日一併錄敘

五月會師追剿山寇藍松山等獲松山餘黨悉降
時仲夏六日丁未山賊藍松山突圍夜遁軍門行
監軍汪公會同家嚴議剿乃於汀州一路分兵三
枝以陳其可金福景良忠各領一枝聽漳南道監
督漳平一路以南路兵分耿宗元暴以平爲二枝
以金科協同爲一枝聽巡海道監督大田尤溪二
路以李趙蔣伯清樂塤爲三大枝聽分巡武平道
監督永福一路以縣丞陳永爲監同崔經楊永等
把截而正兵一路家嚴親督守備胡守仁部下三
總朱珏陳祿陳應朝等從仙遊進以分巡興泉分

守福甯二道監之俱限本月十六日夾攻初九日
庚戌耿宗元金科赴剿至小孟遇賊斬首七十八
級又追至泮溪斬首二十四級先泊海壇山之倭
家嚴已遣義總孫廷賢哨官王漢渡海登山偵邏
哨道茲因進剿山賊乃便道先剿於初十日辛亥
督陸兵渡海登岸於夜山行六十里次日壬子抵
巢以陳祿爲中右路正兵王濟爲右翼奇鋒陳蠶
策應朱珏爲中左路正兵趙記爲左翼奇鋒戚子
明策應兩路如令冲進倭趨平洋突我右軍我軍
奮擊一鼓殲滅惟艮地下闕大海殘倭百餘東北

奔巖勢蹙悉墜海死計擒斬九十五夷前倭盡絕
十二日癸丑南上倭舟三艘爲本汛把總秦經國
督哨官徐相等追及倭急將所攜人貨拋擲水中
開遁釋救俘繫十四人十五日丙辰南上復有倭
舟五艘秦經國督兵追擊力犁三艘溺死無算生
擒十七夷斬首十三級十六日丁巳大兵會集漳
平境山賊藍松山等驚惶莫措竊奔還鄉爲本縣
誘獲蘇阿普范繼祖等奔漳平之大田兩界三山
據險自固大田哨李超等壁巢之南漳平哨耿宗
元金科暴以平等壁巢之北連月來數捷賊已殲殺

過半而阿普止數百人勢窮求撫師徒正當暑月
兼以客兵不服水土且新舊軍門交代之際家嚴
乃准令招撫安插於該縣之田頭赤水箕營等處
正欲與軍門汪公道昆議減客兵練土著節餉省
財爲久遠之計乃撫安未及旬餘而有司要功食
信暗行緝拿夫阿普之罪本在不赦旣誘入土樓
將已就縛必思有以處之使網內之魚永無跋扈
之患乃爲得策卻以一撫安失據之民而汀漳兩
處奪之如連城之壁爭功不解遂致遷延賊穴復
爲逸虎更聚千人雖幸復誘而戮之然反復無常

民心不服因而曾馬遺孽復據龍頭寨以逞則事權之當重可知矣巡撫都御史譚公疏題蕩平大勢山寇捷畧云總兵戚繼光將誓師而賊已膽落監軍汪運籌決策而人知用命以故師不再舉寇靡孑遺自是地方無鋒鏑之慘良善有耕鑿之休

秋七月欽給鎮守關防賜賚白金文綺有差

福建巡按御史李公題大田小尤社嚴小孟等處剿山寇功次疏部覆欽賞銀三十兩紵衣二襲

九月分兵預防興泉漳汀諸郡

是月廣賊未靖乃分布官兵預防之將在省官兵

四枝撥發三枝委坐營把總金科統壁福清爲與
泉聲勢守備胡守仁統本部兵三枝并原中軍移
壁漳州以防海上之變遊擊李趙統本部壁汀州
以爲先聲義總楊文本部兵仍駐延平待廣賊犯
汀聽李遊擊調取合剿而家嚴出巡汀州以示彈
壓巡撫都御史譚公疏薦云盡忠報國用兵如神
本仁義以爲干戈敦詩書而說禮樂治衆則多多
益善職能而謙謙有終夷賊憚其威名稱爲威虎
士庶倚爲性命愛若慈親允爲萬里之長城不直
八閩之厚庇又巡按監察御史李公疏薦云少年

老將短幹長材文武並用而學有淵源智勇兼資
而心無粉飾愛士如曾子之愛身故能得其死命
治兵如越人之治疾動必收其全功輕身以蹈不
測卓卓乎國士之風乘勝而釋不辜恢恢乎仁人
之度百姓愛之如父母南北競壺漿之迎醜虜畏
之如神明山海播老虎之號抑且名遂功成家乏
中人之產位高望重身親下賤之勞藉令專任於
八閩允可垂休於百世

冬十月娶淑人陳氏

十一月潮州送置投撫叛民吳平於詔安之梅嶺

平漳民也先年從倭流劫廣潮厥後自立黨與挾倭剽掠莫可誰何及家嚴屢挫倭鋒平始心懾藉口剿倭贖罪遂降於潮總戎俞公請安插詔安之梅嶺當事者詢於家嚴乃報海道周公書云漳南一切機宜某無不協力者平事可聽之勿拒拒之則無了期如入我境散其黨與分其生理我當真心撫恤或願立功名聽赴軍前報効並以赤心置腹若果以撫愚上官而黨與不解恃眾如故當致之深入我境出於稍平之野用力爲易若據險阻於兩界非我用兵之利也待其敗露當仗三尺與

之決焉調兵一萬不能結雖調十萬不休其利害
某任之不以累公維時倭難孔棘平降庶得專力
爲攘夷計故家嚴言無拒云當事者報可是月俞
公差官押送吳平入梅嶺大徑數十里下闔玄鍾
港四面環水港有二口通大海僅容二舟內有三
土城相聯巖巖如雉堞平於中堡創武場日習兵
事造戰艦百餘艘泊港中據險自固雖託名求贖
不過緩我進兵而實招納亡命乘間竊發復探知
追議勘捕仍與賊首陳晉卿駕船下海流劫廣東
潮惠間且出紙票上書鎮守把總吳令陸釐舊鎮

井井尾等處船隻俱集土園據泊水寨等語更欲招援土賊以謀襲郡城云

十二月巡師漳州

巡撫汪公偵得前情會巡按陳公萬言偕家嚴議乃調督指揮王如龍將義總朱文學朱文達陳良琮婁國華等四部先壁漳州坐營把總陳濠將義總方其葉大正馮煥金守常等四部由陸路止壁漳浦又行副使金公淵督發守備胡守仁將義總戚子明金福吳崑等部策應家嚴於二十四日親巡漳州相機行事以副使周公隨營監督又行咨

兩廣南贛各軍門發兵防截遁逃江廣乃行令吳平束身來見以觀其誠僞仍令都司傅應嘉選取五寨舟師潛泊銅山俟招叛而加兵焉

附錄前陣亡義總童子明係浙江義烏一考吏從家嚴浙福屢立勞效親功七級部功不下三百自死事仙遊未有恤典且親孀乏嗣乃爲敘錄功次請立嗣廕恤聽子明母擇立族賢承廕終養又給殯資遣其柩暨家屬還籍其所激勸士心殆無間於存亡已

嘉靖四十四年乙丑家嚴三十八歲

春二月吳平復叛督水陸兵進剿大破之遂墮梅嶺
土堡

正月二十五日陳濠抵漳浦吳平假以迎候爲辭
遂賺據梅嶺之□□□□陳晉卿率潮賊出據
柑嶺意圖抗拒比有廣東潮州殺敗倭寇三百
餘徒自饒平突至福建之詔安經林婆南坑匿入
深山晝伏夜行又有土賊千人馬百匹亦自饒平
突詔安之土橋係江潮老香公老等賊與平昔年
從倭今來覓平合黨江潮老見官兵壓境懼而散
其黨與束身投撫惟香公老的名林田遁入梅嶺

時平令頭目黃山等來見家嚴因責諭平令剿捕
殘倭縛獻林田以贖罪仍令義總沈秉懿沈元謝
受夫等左右之平懼兵威欲借勦倭自贖以緩進
兵卽將田縛獻又遣知譯人林春誘接殘倭誑以
坐船下海倭深信之隨出山至烏石去巢十餘里
平率衆生擒真倭也骨羅等九十九名從賊二名
斬首四十級餘倭遁海塗渰溺盡絕平將生倭分
解二十名送潮惠總戎俞公其七十九名從賊二
名倭首四十級解赴家嚴但平雖陽托勦倭而寔
陰懷觀望且爲晉卿煽惑不肯束身投見又漳浦

去巢一百五十餘里雲霄一帶奸民多爲賊偵而
賊舟具備且密邇廣東遂咨會俞公夾勦俞書云
承教調船二十內外何其機會之相湊乎猷所調
度廣船約二十亦到陸兵六千足當一面船篷俱
標小黃旗爲識又書爲隱語乞速進攻勿疑家嚴
得書遂催督水陸進勦十九日丙戌水兵開自浯
嶼二十一日戊子陸兵發自漳浦本夜水兵至望
鍾海洋二十二日巳丑陸兵至雲霄大兵方集奸
細潛報於平平乃於十九日將家屬貨殖盡運舟
中二十三日比曉沖浪而出水部傅應嘉等遵受

機宜分布港口應嘉興把總鄧銓統捕盜陳堯英
謝樸等舟爲前鋒哨官李騰蛟劉文敬率捕盜汪
奇許爵等舟爲協翼賊且戰且走被我兵犁沉一
百五艘漂溺賊徒三千餘眾生擒賊徒一百四十
五醜賊目五十餘徒斬首五十三級釋救俘係男
婦七十八人是時俞公失期寂無一舟會勦賊遂
得長驅入廣又移文俞公夾截次日於陷鍾所搜
獲賊馬六十八匹其生擒者押赴旗牌下坐以軍
律梅嶺三城盡平因撤砌石壘貯城級仍立石以
誠後人勿再築城堡乃留王都司兵二千壁詔安

而_因鍾千人爲備仍分遣各兵及生員耆老等鄉
兵分投各寨盡數剿滅餘黨悉平時_甯德生員蔡
景榕自日本逃回報稱各島今春入犯與賊首郭
成嘉供報相同汪公陳公會行南路署守備耿宗
元脩舟楫把總金科催赴班官兵右布政陳公大
賓福州知府胡備餉候家嚴給水陸分布防禦是
月蘇賊遺孽曾東田馬湘源復嘯聚結寨據龍頭
山

三月自梅嶺班師北還會兩院議分禦春汛

家嚴自梅嶺還值春汛戒嚴如舊議每水寨舟三

十二艘把總魏宗瀚分汛烽火門以千戶晏元秋
協之把總蔣伯清分汛小埕以千戶顧喬協之把
總羅繼祖分汛南日以守備楊文協之把總朱璣
分汛浯嶼以千戶王毫協之哨官倪府等統本哨
署汛銅山俱防之於海以都司王如龍統兵三千
二百守南路聽候海道周公監督以叅將李超統
兵三千二百守北路聽建甯道黃公希憲監督以
守備張元勲坐營把總陳濠各統兵二千五百協
守中路聽分守福甯道塗公澤民監督以把總金
科統兵一千二百人分守泉州聽興泉道何公監

督以都司胡守仁統訓練土兵一千八百人守省會家嚴親統義總吳京胡大受方伯方其等部兵二千二百人止壁鎮東專備應援截殺又遣義總沈秉懿示都司傅應嘉追剿吳平方畧及催促進兵十八日乙卯吳賊舟泊海豐之大勝港應嘉等追及之冲散出洋遇颶風作陳晉卿舟破登岸遁駝山爲廣東陸兵所挫餘舟漂散各洋

夏四月遣兵追吳平至廣東大潭澳敗之而還復擊敗大潭澳鈞澳曲鼻澳諸倭進攻龍頭寨山寇

初三日巳巳吳賊復聚廣東大潭澳閩兵都司傅

應嘉急躍之適遇廣將湯克寬應嘉與約分奇正爲二枝以進福兵自官塢出福堂門爲正軍沖鋒廣兵自急水門出鵝冠頭爲奇兵設伏賊素畏福兵望風而遁又遇伏起兩軍夾攻共沖沉賊舟二十餘艘漂溺無算福兵斬馘賊首陳月洲等百二十級廣兵斬馘賊首林學盛等二十五級會颶風大作餘賊乘浪四遁乃審俘賊供稱吳平自大勝港漂散未知生死去向於是應嘉班師回閩十二日戊寅倭舟一艘約百五十餘人突犯永甯衛之沙隄澳登岸逼城指揮伯希周戴槐等以倭少輕

敵冒進而蹶會水汛哨官陳遜玉率水兵登陸夾擊之飛鉛擊斃二倭倭乃敗復原澳次日巳卯泉州陸汛把總金科督義總馮煥金守常等部兵馳擊倭巢鏖戰時久倭遁據海嶼我兵涉水登嶼倭勢窮促投海漂溺生擒五名斬首五十九級奪獲甲仗一百二十六件我兵陣亡者朱虎等四人時仲叔柳塘公亦斬首二級以家嚴借廕千戶從征也水兵協勦斬首十七級盡馘其眾比時龍頭寨山賊乘間出劫此寨在元李烏嘴所據昭代正統間爲鄧茂七所據邇年楊一被擒而蘇阿普復作

阿普繼擒而會東田馬湘源復作皆由萬而千由
千而百梟雄精悍結巢龍頭堅築敵樓土牆設立
重門木柵上據峰巒下臨溪澗渡以獨木守以數
人時出時入未可易制家嚴深知絕險難攻止宜
分布先絕糧道徐圖進取乃遣部將都司王如龍
統兵三千駐龍頭以同知鄧公監督註興攻圍圖
畫方畧以義總朱文達壁守斷橋樓國華壁守小
牛蹄彥珊壁守大牛朱文學壁守西溪右山石子
龍壁守西溪左山義總陳良琮同中軍壁屯西溪
口之平洋爲老營守備丁介夫義總張成額錢助

禮等壁守營頭周圍壁壘相連繹絡三十餘里是
役也運籌神密賊更何所測哉二十日丙戌傅應
嘉班師抵謝浪表瞭見賊舟八艘乃令把總鄧銓
督鎮撫葉盛簪等追及外洋盡犁沉之夜颶不獲
收功止生擒賊首蕭四等三十三人斬首六級餘
眾漂溺釋救俘係男婦二十餘人遂將應嘉等部
留守銅山以待不虞二十二日戊子倭舟十艘由
浙海駕來台山本汛把總魏宗瀚督舟師追之六
艘遠遁四艘突入南鎮釣澳約三百餘徒搶劫麻
纜商舟五艘勢漸及岸宗瀚馳約陸汛叅將李超

夾勦二十三日巳丑超兵次陳家下洋遇倭六十
餘前鋒義總胡仲膏接戰正酣胡世繼隨後策應
倭北奔入茅房我兵一火焚絕比時風火交狂澳
醜心挫會水兵乘潮入澳犁沉一舟倭乃棄舟登
陸水兵遂將空舟撤出洋外陸兵三路拒敵大敗
倭奴斬首一十三級賊退奔舟舟已亡通潮海中
者無算釋救俘係八人奪獲倭舟八艘甲仗三百
九十三件我兵陣亡者哨長傅一元等九人仍有
五十餘賊遁遁郎黨山會入夜收兵次辰庚寅急
躡其後巳得實管漁舟下海遇三沙民舟陳統犁

沉漁舠生擒十二俘斬首七級二十五日辛卯倭
舟四艘駕浮磔下洋小埕把總蔣伯清督哨官林
松呼良朋等犁沉二艘二艘攔洋我舟不能近乃
以小舟縱火焚之斬首二級餘倭八十餘奔閭峽
羅浮田澳登岸夜突三溪次日壬辰乘雨又突長
村掩襲土堡焚劫民屋李超掣兵協勦水陸兵斬
首五十四級餘遁海西之武曲又遁青皎埧頭超
督胡世葉珊等追及青皎等處斬首二十三級奪
獲器械二十七件我兵陣亡駱文龍等三人諸亡
命遁去二十七日癸巳又倭舟一艘約百餘賊流

突曲鼻澳登岸屯日澳時倭分各澳紛登家嚴慮
李超兵寡又發都司胡守仁統水營趙記朱珏二
部守備張元勳統陸兵姜虎傳推誠二部各授方
畧策應日澳是夜倭懼竟開洋遁去二十八日甲
午倭賊五十餘徒突至閭峽南山後壁登岸次日
李超分發徐全部兵追之南屏設伏斬首十四級
獲鎗銃十二件餘倭帶傷遁竄山麓

五月刈塹圍龍頭寨復分部追剿敗倭

是月丙申朔守羅浮哨官張應官鄉兵張植各擒
生倭一名初三日戊戌都司王如龍進攻龍頭寨

山賊朱文學先登岸斬首七級連克木柵重門越馬鞍山賊退據土牆時已及午霖雨滂沱火藥不然又兼路滑巢險木石交下遂收兵據壘以守時浙兵陣亡駱景貴等一十四人緣賊有險有備未可力勝乃度要害設重柵開坑塹以守困之其塹密布竹籬雜以叉木葢草寮以棲息建敵樓以瞭望列圍九十餘里初四日巳亥倭舟二艘約賊二百餘徒自浙平陽江口浮至南鹿深洋本信烽火把總魏宗瀚督舟師追及犁二艘浪湧漂溺無數止生擒五名斬首三級奪獲衣仗二十九件自是

各艘敗倭復合爲二枝一遁福安之茶園西村一遁閩峽之青皎深坑各晝伏夜行間多餓死家嚴命叅將李超分發義總胡世何集之二部追勦西村之倭徐全胡仲膏二部追勦深坑等處初六日辛丑胡世抵西村斬首三十七級釋放俘係一十四人奪獲器仗十有九件我兵陣亡哨官葉正等三名徐全抵青皎搜斬倭首十七級釋救俘係男婦四人前發策應守備張元勲等並各衛所搜山捕勦共擒斬一百四十夷前倭盡絕十七日壬子龍頭山賊見四面星羅網布遁亡無路勢迫思招

都司王如龍乃遣家丁王文郭子良入巢招諭並
勘虛寔俱被留以賊首梁德王智陳明出見遂亦
拘候比日屢出突西溪繼橋等處俱被我兵截退
二十六日辛酉以煩匠王亞七所造木煩架而攻
巢一發穿牆三孔摧折大樹一株立斃兩賊黨從
號魄二十六日賊酋廖化田溫北泉攜妻子潛走
張成顯信地盡爲我兵所獲而賊益懼

六月山寇馬湘源曾東田皆伏誅叛民吳平遁據南
澳

是月二日丁卯令哨官郭春意舍人勾焯省祭蕭

檀同監北山義民廖一仔入巢招撫謀擒二首賊
見圍堅迫不得已將賊首曾東田縛獻當賞廖一
仔銀十兩遣之仍縱賊總許成川入巢安眾謀擒
湘源是夜賊分二百餘人潛突溪口哨官石子龍
王子明等禦卻之初三日戊辰賊將前入撫家丁
郭子良放出止留王文仍令郭春意等再入巢挾
以兵威初四日巳巳賊又將湘源縛獻賊尋悔支
解我入撫家丁王文賊總許成川疑畏不出與渠
魁廖古堂等決謀奔突家嚴發陳鷲部兵一枝協
剿又行牌云馬曾二酋已擒取彼兇殘用彰國伐

本官與鄧同知之功懋矣但炎暑徂征窮荒瘴癘
士卒披風冒雨日戰夜守本鎮備悉其破巢之日
財物聽兵收取不許各官追奪初五日庚申賊突
小溪哨官何本清等禦之賊復回突溪口又爲哨
官石子龍蔣魁等禦卻之十二日丁丑夜賊分二
路一冲朱文達一冲錢助禮兩軍俱禦卻之二十
日乙酉賊又突樓國華軍哨官盛柏亦禦卻之二
十二日丁亥海道周公詣東西溪視地形開設縣
治因與王都司議天暑持久疲勞可虞用寓勦撫
之法親詣營頭以安撫爲名使人入諭適有賊總

廖月華鄭元招蘇興王碧泉等四人假投撫出探
忽報賊突水溪之圍哨官楊亮禦卻之賊飛鉛傷
我兵我兵趙德奮擒廖月華等責令追索舉烽之
賊縛軍前斬之先是吳平白仲春於[子]鍾港大敗
南遁將入西洋適遇廣東叅將湯克寬招帶而東
遂遍掠廣海收珠池羅賊之黨萬眾集烏尾[子]鍾
等舟百艘反寇惠潮長驅回閩家嚴乃命都司傅
應嘉把總朱璣協總王臺統督小埕浯嶼二寨舟
師四十六艘分泊[子]鍾等處以備之是月二十三
日戊子賊突[子]鍾圍擄我舟十三艘而朱璣王臺

被執應嘉自知眾寡不敵遂全師回守銅山賊亦退據南澳於深澳山築土堡木城於宰猪澳立柵據守時分支黨出掠沿海附近居民反爲接濟家嚴聞報卽會議兩院盡兩省材官八府藏帑五寨舟師三百餘號聚土客陸卒一萬餘人以傅都司應嘉總統舟師聽興泉道監督專備水戰以李叅將趙金把總科領陸兵家嚴親督專備陸戰仍行漳州知府唐公九臯泉州知府萬公慶接應兵餉漳州同知劉公應寅隨營紀錄一面盟約廣兵會勦擬以七月十七日移鎮漳州並刷撫民王龍等

漁舟大集月港限仲秋朔日水陸大舉

秋七月龍頭山寇蕩平遂如師漳州會勦吳平尋題
春汛倭功詔賚白金文綺有差

是月朔乙未龍頭山賊突圍哨官盛柏楊守賢等
禦卻之斬首一級初二日丙申賊製綿甲竹盔厚
底布鞋以備鉛火且簇執長鈎以破木柵殊死突
西溪龍頭山圍義總陳良琮督哨官蔣奎樓大用
王子明等禦卻之初四日戊戌夜賊復突鄉兵張
成顯軍破木柵十餘丈幾致虎兕出柙幸義總錢
助禮朱文達哨官龔時清等禦卻之止逸二十九

人卽遣兵追及大牛林生擒十五人斬首十二級
鄉兵又生擒二名一面督兵攻巢燹鉛彈死賊徒
甚衆賊亦施滾木擗石我兵陣亡十七人日晚收
兵將逸賊首級懸示巢前賊甚恐十六日庚戌賊
總賴子許成川林子章等八人各帶妻子出巢投
降乞哀受死供報糧盡願引兵破巢遂許之本夜
義總錢助禮部兵帶火器明攻營頭顯張敵愾暗
發陳良琮陳蠶二部帶賊賴子等嚮道潛伏水溪
坑底四鼓抵龍尾山巢賴子等先入掩殺守更二
賊引各兵砍柵而進賊始覺棄營頭不守退奔入

巢督哨錢助禮自營頭追入朱文達由斷橋進朱文學由南山腰進樓國華駱彥珊由北山腰進各兵四分齊擁賊巢乘勝縱焚冒焰投潭溺燬無算計斬首二百有二級生擒賊徒九人賊首婦女八人從賊妻子八十五人釋救俘係男婦三百有奇奪獲器械一百餘件我兵陣亡蔡隆等四名其財物子女俱照原約盡賚士卒是役通共擒斬二百五十有七醜浙兵陣亡四十餘人乃燬巢屋墮土堡鋤木柵而班師斯寨爲二府扼要地數十年嘯聚之區暑月興師炎熱逼人瘴煙撲鼻且相持數

月日夜守柵頃刻不懈沖冒瘡瘡而死者不下千百人至是變盜藪爲桑麻化頑民爲禮俗信奇功也十七日辛亥家嚴如師漳州進剿吳平以叅將李超統兵四部壁雲霄嶺以爲主兵以把總曹南金統戚子明石成紹二部壁詔安以把總魏國統方柏朱九龍二部壁漳浦家嚴親統標兵壁漳州營壘相望聲勢聯絡誓殲巨魁以收全功

都御史汪公題春汛分部水陸兵剿滅各起倭賊疏畧云履滿而心虛謹之又謹居安而慮危防乎其防諸部因之受成千里爲之決勝昔以將兵奏

月久傳金言 卷三
績今以將將成功羣策畢張八閩永賴疏上欽賞
銀二十兩紵絲二表裏

八月進兵泊南澳困逼吳平

比年大兵駐漳坐守兩月糜費鉅萬以約會廣兵
而廣兵失期不至且遍揭潮州漏洩軍機遂以虛
聲懾其先遁聞兵越省遠追廣海二十里方遇廣
兵於佛堂門兩捷食盡而還家嚴方欲爲同寅彌
縫不意反噬者邀功嫁禍於是兩廣軍門信其雌
黃而反責家嚴不緩師以俟廣兵家嚴乃將催會
書檄繳送兩廣軍門而張弧之疑少釋功罪始得

陷白時大兵屯集於詔安漳浦間將已匝月而廣
兵惟空封漁艚百艘於海門以示虛聲家嚴曰南
澳港口二空僅容一舟出入備極險阻若賊糧已
足築壘已堅變客爲主縱有十萬之師亦無如彼
何矣況賊日肆陸梁師老財匱咎將安歸耶且平
初意亦欲積糧築壘爲久據計近聞大兵已會墮
盡撤土圍各舟出口繫泊意在必遁賊如復遁卽
徒守空盟何益於事遂以朔日期會大兵於月港
海口誓衆出師并究坐陷主將退縮之罪斬朱璣
部下退縮哨官以徇然後督發出洋乃先促傅都

司移舟進泊近港澳口偵其虛寔以俟進取十五日直抵南澳力犂賊舟五艘擒斬二十餘醜賊舟被逼復斂退入港據柵自固因下令載石鑿舟沉塞港口盡以兵舟環列烈嶼宰豬大沙等澳賊眾坐困仍負固據險而守家嚴因調刷漁舟五百艘行糧三千餘石以俟統陸兵渡海登澳水陸并攻仍行巡海道周公督漳州鄧公調集鄉兵布守柘林以北行廣海道翁公督饒平知縣管公惟乾調集廣鄉兵分布柘林以南以防賊遁十八日潮州沿海居民夜駕小舸載硝黃入巢贖取人口其大

城所更開門延賊且以小舸販賣牲畜蔬果家嚴
乃嚴行禁約拘刷近海民舟盡收入官俟賊滅之
日給領其有自行鑿沉毀折柵櫓者聽之而接濟
之路始絕

九月連捷龍眼沙

家嚴令吳士選齋文諭吳平獻謀主陳晉卿束身
聽撫平詭斬假級申揭家嚴復行把總李騰蛟督
平務令生縛晉卿等十九人并斬頭目吳榮等三
級及原擄協總王毫解獻軍前以求自贖然終懷
詭譎不肯束身投見家嚴親坐小舸直抵深澳歷

覽地形十六日令陸兵自圖鍾所登舟乘夜至柘林港再駕小舸親視南澳其宰豬大澳切近賊巢而崖巖峻絕彼得專力禦我難與爭利惟龍眼沙坦而可步且去巢三十里得從容布算遂決意進兵畫定軍令

附初登龍眼沙號令畧云今水陸大舉夾剿劇賊初七日爲始陸續俱到圖鍾渡一應後開方畧務嚴諭所部依期奮攻水陸同體一心惟念受國厚恩共期滅賊以圖補報水兵必期截賊入澳把守無缺勿使賊有一舟出入陸兵方可効力其擒獲

吳賊如係陸兵亦必與傅都司共之卽陸有斬獲亦量行分級以酬風波之苦毋得畏避愆期違慢條約致賊得以并力向陸今該本鎮會同巡海道監督陸兵副使周議得舟師困圍已久陸兵又齊相應部分整肅以便奇正迭出務要遵照號令奮勇當先必使賊徒一覩不留方爲奇功或退縮觀望進止不齊定以軍法從事凡臨陣棄刃哀祈者不許混殺旣鬪之後被擄不戰者不許妄殺各存天理以明仁者之師各積陰騭以爲子孫之計今將會定方畧合行開示仰各偏將通行把哨人等

一體曉諭敢有違令誤事者偏將以下俱以軍法示眾決不輕貸

一偏將專司號令專催第一層兵向前當鋒義總專領本部兵當前哨官各領本哨向前沖殺一今以義總方和朱九龍戚子明俱屬偏將曹南金統督爲中路內方和朱九龍爲沖鋒正兵戚子明爲沖鋒策應奇兵

一以義總金崇岳馮煥金守常陳蠶俱屬偏將金科統督爲左路內金崇岳馮煥金守常爲沖鋒正兵陳蠶爲左路沖鋒策應奇兵

一以義總鮑文龍胡世徐全俱屬偏將張邁統
督爲右路內鮑文龍胡世爲沖鋒正兵徐全爲
右路沖鋒奇兵

一三路策應奇兵俱屬李叅將統督

一義總胡仲膏石成紹陳祿俱屬偏將吳京統
督爲老營

一俱照圖列陣今每總各給圖一張

一先本鎮擇日於教場內合營教演熟習臨陣
卽如教場內一般號令一般進止違者斬首號
令不明偏將處以軍法前鋒退避義總與先退

之哨及退哨隊兵斬首策應兵卽當沖上若策
應兵一體後卻李叅將與失退總哨隊兵一體
處以軍法

一各臨行之時聽本鎮先示期約軍令到營整
備船隻行李登舟肅靜聽本鎮到營升銃行旗
各船先開中路次開左路次開右路次開策應
兵次開老營每一路舟在一艖每一總又爲一
艖務相連屬此須各偏將義總預與哨隊長說
明各船戶拘在一處再三萬萬叮嚀明白船戶
不省官話可覓一能官話又能鄉談者字字傳

說務要通知只各要認桅上旗爲號

一行船船戶只聽各船內官哨隊指點向往進止若違令及臨山不肯撈船近岸者該船哨隊長卽將船戶割耳甚者送鎮斬首須將此條臨發時寫出貼在船桅上解說與船戶明白

一四路兵恐船上混雜一時船家不能認踪取齊未免官兵喊叫有違軍令且滿海是蓬官兵亦難辨認今定號旗每船一面懸於桅頭晝夜不得放落中路俱用紅布旗左路俱用藍布旗右路俱用白布旗老營俱用黃布旗每旗一面

布方三幅偏將旗上色同加以畫彩義總旗上加號帶一根哨官旗上加別色圓月一箇徑二尺

一各船到彼岸時不可徑逼岸須於一箭之外銃不及處少待各營各總船齊務要肅靜無譁各聽李叅將中軍船發礮三聲各船一齊駕近岸邊一齊吶喊徑奔上岸遇賊便殺上岸不許過一里便扎營賊走不許追過三十步過者雖勝亦斬其總哨官與在先一人

一追賊去卽速整隊伍一字向前路扎定坐待

本鎮到指揮或建木城或奪許朝光舊棄城爲
老營札在船邊

一是日先札營定卽直取許朝光舊城取畢卽
聽傳令先放老營回船取竹木卽於土堡邊或
船邊相地建豎木城限一時卽完居守肅靜夜
晚中左路收入土城老營收入木城右路收入
船上四更聽摔拔响造飯五更食畢聽令登山
或徑進巢或候建木城

一次口如建木城卽以右路兵帶竹木上岸去
土城前三三里高山頭占據形勢見豎木城以

申路左路各札成陣勢於木城前一帶候賊來
卽戰以後聽臨時號令

一建豎木城之時若賊條來索戰候賊到五里
內卽將木城暫止其建木城之兵卽照原分路
向前列陣同三路取齊少坐一刻聽令徑沖前
去不可待他沖來

一殺賊大敗只在險阻處便止不許徑追進剿
有令催進方許徑上

一策應奇兵在左路者專以一總在海邊搜尋
石巖而進以防沿海之伏如有伏兵闌出皆此

總之責在右路者專以一總在高山頂瞭防山頂右畔伏兵及搜山頂林木草叢埋伏如有伏兵闌出皆此路之責

一各兵到彼之際每日攜空草鞋一雙於腰間先用木底草鞋登山若無竹籤卽換空鞋遇竹籤又穿木底鞋但釘籤埋在草中未易尋覓不可輕易便不用木底鞋也

一每日登山炊飯時必各留飯一團齎帶腰間以備午餐火兵止備熱湯依時供用

一冲鋒不許取首級及搜賊身財物以致誤事

今旃營真正沖鋒兵懸賞銀每名十兩通營懸賞銀二萬兩若沖鋒兵不專殺賊或取首級或貪財物致隊伍錯亂誤事但有一兵負衣物銀兩者卽將全營沖鋒銀入官不給正犯以軍法斬首

一此賊積蓄數年雖有銀兩衣帛之富多是藏匿各處未必都在巢中船中賊兵雖敗必是整衆伏竄別山我兵殺到不許擅自先搶入巢取財必須先燒巢房圍攻船隻已盡山上土堡內無賊仍將三路兵分爲三處徑往各山搜賊賊

盡方可尋取貨物獲得真賊從容拷問他自是
指出埋藏銀物之處若賊巢初燒賊尚在船未
及搜山而縱兵四散亂取財物者但背負衣包
便行追焚兵犯一面割耳一面送鎮斬首

一自來賊計多以首級財物愚我兵心故意佯
敗將敝衣虛包砂石擺棄空巢使我兵爭取因
而行伍散亂賊卻伏在山中船上窺看一中其
計遂齊擁出彼整而有心我亂而不防轉身迎
戰不及竟爾奔走屢被沖散萬勿墜此計中進
巢之際老營與策應兵各整隊相定以待沖鋒

攻戰大捷班師沖鋒銀兩一體平分首級男婦
以十名十顆爲率沖鋒兵六分老營策應共四
分若老營策應兵但有一人向前混取財物者
沖鋒銀兩都給沖鋒兵老營策應不給仍罪其
首犯以軍法

時連旬颶風至二十二日始霽漏五鼓家嚴督陸
兵載柵木浮舟渡海登龍眼沙出柘林港山深林
密賊逐處設伏廣布機檻我兵隨山刊木因地結
營沖鋒壯士整軍以待老營先立木柵次日沖鋒
兵亦立柵爲城有賊衆二千設伏誘戰家嚴嚴戒

官兵以全勝爲功如慕首級貪輜重罪在不宥因
令指揮曹南金方伯義總朱九龍等成軍而出直
攔其鋒賊不能支倒戈逐北自相蹂躪所棄盔甲
鎗刀積如山嶺止取前點四級殲戮數百餘衆我
兵不損一人平歸大誓衆賊且捐貲三千兩分給
選鋒銳三千人又置新紅旗以口字內加天字爲
號將爲再戰計家嚴乃刊脅從棄刃不死之檄俟
臨陣拋擲以攜其黨二十五日平自率衆逆戰列
一陣者三山上攻下我兵曹南金金科張邁吳京
李超合五軍仰迎之散檄滿空有一紙直升雲表

忽三野鷹自天而下共抓以去賊黨見檄俱無關
志我兵奮勇一擊賊遂大敗我兵直追至山隈藤
蘿密織恐餌於伏乃全師而歸計斬馘五百餘魄
因遵令不尚首功止取執旗賊首六級平自此再
敗落魄喪胆隱伏深林不敢出戰是日廣東總兵
俞公統督叅將湯公克寬王公詔原任都司白公
瀚紀守備姚允恭及把總陳其可鎮撫許朝光等
分率大小舟師三百餘艘始至家巖乃會集兩省
將帥歃血誓盟同心滅賊於是約會兩省舟師分
布信地蓋賊巢水路共有三門通舟出入中門并

雲蓋寺專責閩都司傅應嘉把總顧喬許瀚以廣
叅將王詔佐之上門專責閩游擊魏宗瀚以廣把
總陳其可守備姚允恭鎮撫許朝光佐之下門專
責廣叅將湯克寬都司白瀚紀以閩把總羅繼祖
佐之如賊以大舟沖突則合力同追如賊以小艇
夜遁則責在信地萬一風濤不時遯脫老岸務在
併力追擊由廣境則以廣兵爲主閩兵佐之由閩
境則以閩兵爲主廣兵佐之又恐賊渡老岸遁山
復行巡海道調發詔安縣鄉兵布洋林一帶長柵
列守又面訂饒平知縣管公惟乾及行廣東兩道

調集鄉兵列柵截守東界上抵柘林一帶而連日
颶風大作不克進兵

冬十月大敗吳平於宰豬澳

是月初四日丁卯颶風始憩平賊旦夕惟懼襲巢
遂不備大沙宰豬二澳家嚴於是夜陰約水陸將
領密示師期以指揮曹南金統方柏朱九龍各部
兵爲中軍坐營把總金科統金崇岳馮煥金守常
各部兵爲左軍義總胡世鮑文龍各部兵爲右軍
把總魏國戚子明各部兵爲中軍策應以陳蠶部
兵爲左軍策應徐全部兵爲右軍策應俱屬李叅

將趙統領家嚴親督趨宰豬澳擣巢以指揮吳京
統義總石成紹毛介陳祿各部兵趨大沙澳阻截
原屯龍眼沙雲蓋寺之賊廣東總兵俞公駐下門
督水兵守各澳口防遁再三申約各舟預先張帆
起碇以備截擊於鷄鳴整伍銜枚登舟遲明直薄
賊所齊泊宰豬大沙二澳中軍先登徑取吳平本
寨左軍繼取後巢右軍繼取土圍各兵併進策應
平賊獨立寨前石巖張黃蓋指揮拒敵我兵奮勇
攻入賊遂退據木城眾兵四面合圍斬柵而登賊
潰而四奔者半匿林逐舟半投崖赴水我兵水陸

併力隨將賊巢賊舟盡行焚燬後有大烏舟一艘亦執黃蓋張弩標鉛悉力抵戰我兵拋擲火毬各賊投水自溺福兵擒斬賊首共一千二百有三醜焚溺五千餘徒釋救俘係把總朱璣并男婦一千八百餘人比時血戰者李超等陣亡者吳六八等也廣兵亦斬數百有奇先是聞陸兵舟過廣兵檣側見閩兵粉墨其面如鬼如厲廣兵鼓掌大笑不信閩兵能一鼓破賊若是也於時廣兵違令不預起蓬旋以致吳平率八百餘徒駕叭喇唬小艘四十艘從容由下門沖脫俞公督本信湯克寬羅繼

祖等躡踪擊之家嚴在巢督兵搜捕瞭見賊遁卽
令傅都司同追協犁賊舟十八艘仍漏賊七百餘
俱赤手突向潮州家嚴又發叅將李超統義總胡
仲膏徐全鮑文龍胡世等兵二千四百取道柘林
協同追剿又發義總陳蠶戚子明等二營一千二
百人附超帶領前途交與應嘉統爲策應俱准俞
公調度夾剿窮追是日將暮賊至陳棠驛登岸正
值饒平鄉兵夜炊知縣管公惟乾旣不設柵阻海
復不敢堵截見徒搏之賊望風奔潰賊因得熟食
濟饑又得利器濟用而死灰復然矣初八日辛未

賊突鳳凰山破土圍脅從五百人合黨初九日壬申李叅將超傅都司應嘉與俞總兵會集潮州李超率兵追賊應嘉督饒平鄉兵壁守漁嶺十一日超追至硫黃糧盡乏食同知鄧公齋餉銀入饒平易米管知縣閉城不納士餒竟日乃取青穀於田中炒碾濟饑十二日乙亥管知縣領鄉兵壁近鳳凰山被賊劫殺鄉兵二百餘人僅以身免器械鞍馬盡委於賊而李超獨統六總撤分二路一由鳳凰山入延坪追其後一由潭澳抄出烏槎迎擊其前十五日戊寅徐全陳蠶鮑文龍等由鳳凰山追

漳溪斬首三十七級以孤軍寡援不敢窮追賊遂遁鰲坑入深林轉走時家嚴尙在南澳搜巢偵得平帶殘黨欲自漳溪遯海乃關會總兵俞公僉事翁公委彼省哨官楊儼俞盛等先將沿海漁舟鑿沉以防賊遁十六日巳卯李超督胡世戚子明胡仲膏由烏槎追至烏嶺屯壁與魚嶺傅應嘉約次日並進相爲犄角不意夜二鼓鄉兵貪攘專功潛先下山遂爲賊擊潰賊且追上嶺我兵不備因而失利傅應嘉陳其可僅以身免次日庚辰賊至潘段公館守截廣兵謝恩林春木等不戰而卻賊乃

得路由饒平之荔枝園陳埭等處脫遁家嚴聞報
卽督標兵急馳廣境比及黃岡賊知大兵至夜奔
二百里由百丈埔復出陳埭趨潮州港口家嚴喜
賊來就我又入死地前阻水後阻兵共期滅此朝食
卽督兵倍地趨利十九日壬午賊到林漳相距
止二十里詎意儼盛等慢令不肯鑿沉魚舟容留
七十二艘楨具完全泊澳以待被賊駕三十餘艘
揚帆入海并擄巡檢兵舟二艘抵海門所又擄漁
舟十五艘合艚開遁家嚴卽調傳都司統閩舟會
合廣兵湯叅將開洋窮追擊之於海親統李叅將

等陸兵壁潮州備之於陸二十二日乙酉傅都司等兵追及海洋沖擊散遁二十四日丁亥賊舟一鯨九艘約六百人突至惠來縣之赤水澳棄舟登岸連破雲落南洋虎坑等寨賊焰復張

是月兵部題覆剿滅各起倭奴類報捷音疏欽賞銀二十兩紵絲衣二襲

十一月追吳平於廣東綿羊寨大克之

十九日壬子家嚴親督部兵自潮州進次揭陽海防道委巡檢張歷運餉接濟賊聞大兵至轉遁長樂高橋寨倚山結巢官兵連日窮追沿途渺無民

居皆投荒露宿冒瘴曉行二十五日戊午抵大廟
前哨擒賊總林信謝有因審知賊中虛寔督兵分
路進會綿羊寨於二十七日庚申夜分布將士以
指揮曹南金將前軍統指揮方柏義總朱九龍戚
子明等所部兵叅將李超將後軍統義總胡世張
邁等所部兵海防部兵哨官林春木等并潮州知
府胡公廷順分統鄉兵俱爲策應乃深入萬山皆
鳥道羊腸而人馬墜跌損傷甚衆五鼓抵巢賊黨
驚潰各棄刃投林時方昧爽乃合兵四圍沖其中
堅一面舉火焚巢然及山澤焚燬無算計擒斬賊

總李貴田新老陳總管并賊徒九十八醜奪獲馬
匹器械五十有奇釋救俘係生員共男婦五十三
人時報敗賊一夥復聚南澳未審吳平何在家嚴
乃趨回南澳而偵報前冲散海遯餘賊遠竄雷廉
家嚴卽行漳州整刷官民船隻百艘厚給五月食
餉調取傅都司統兵追剿以守備楊文副之并調
同知鄧公士元監督前赴廣海擬二十七日於月
港督發啟行

十二月督部將追剿吳平

十五日戊寅傅應嘉舟師次平鍾家巖會同巡海

道周公閱視祭江誓衆將士踴躍登舟二十九日
壬辰舟師次廣東之南海時潮州奉提督兩廣軍
門吳公鈞檄動支官銀二百兩差官齎餽家嚴乃
對來使通集三軍自偏將以至伍卒各分賚有差

戚少保年譜耆編卷之五終